

**A** fertur: Polluatur cruore puerpera: obstetrices suscipiāt paruulum uagientem, maritus lassam teneat uxorem. Sic incipiant nuptiæ, ne euangelista mentitus sit. Sed absit, ut hoc de matre saluatoris & uiro iusto sit existimandum. Nulla ibi obstetrix, nulla muliercularum sedulitas intercessit: ipsa pannis inuoluit infantem, ipsa & mater & obstetrix fuit: Et collocauit eum, inquit, in præsepio, quia non erat ei locus in diuersorio. Quæ sententia & apocryphorum deliramenta conuincit, dum Maria ipsa pannis inuoluit infantem: & Heluidij expleri non patitur uoluntatem, dum in diuersorio locus non fuit nuptiarum. Verum quia iam satis abunde respondimus ad id quod proposuerat, antequam conuenirent, & nō cognouit eam donec peperit filium: ad tertiam ueniendum est quæstionem, ut iuxta disputationis eius ordinem, etiam nostræ responsionis ordo procedat. Vult enim alios quoque filios Mariam procreasse, & ex eo quod scriptum est: Ascendit autem Ioseph in ciuitatem Dauid, ut profiteretur cum Maria uxore sua prægnante: Factum est autem cum ibi essent, impleti sunt dies ut pareret, & peperit filium suum primogenitum: nititur approbare primogenitum non posse dici, nisi eum qui habeat & fratres, sicut unigenitus ille uocatur, qui parētibus solus sit filius. Nos autem ita definimus: Omnis unigenitus, & primogenitus: non omnis primogenitus, & unigenitus. Primogenitus est nō tantum post quem & alij, sed ante quem nullus. Omne, inquit dominus ad Aaron, quod aperit uuluam, ab omni carne quæ offertur domino, ab homine usque ad pecus, tibi erunt, tantummodo precijs redimant primogenita hominum, & primogenita pecorum immundorum. Definiuit sermo dei, quid sit primogenitum: Omne, inquit, quod aperit uuluam. Alioqui si non est primogenitus, nisi is tantum quem sequuntur fratres, tamdiu sacerdotibus primogenita non debentur, quamdiu & alia fuerint procreata, ne forte partu postea nō sequente, unigenitus sit, & non primogenitus. Redemptio, inquit, eius erit ab uno mense, æstimatio quinque siclorum. Siclus, secundum siclum sanctuarij uiginti oboli sunt. Tantummodo primogenita uiculorum & primogenita ouium & primogenita caprarum nō redimes, quia sancta sunt. Cogit me sermo dei, ut omne masculinū quod aperit uuluam, si de mundis animalibus sit, deo uoueam: si de immundis, redimam, dans precium sacerdoti. Possum respondere, & dicere. Quid me in unius mensis stringis articulo? Quid primogenitum uocas, quem an fratres sequantur, ignoro? Expecta donec nascatur secundus. Nihil deo sacerdoti, nisi & ille fuerit procreatus, per quem is qui ante natus est, incipiat esse primogenitus. Nōne mihi ipsi apices loquentur, & me stulticiæ redarguent, eum esse dictum primogenitum, qui aperiat uuluam, non qui habeat & fratres? Denique interrogo de Ioanne, quem constat esse unigenitum, an & primogenitus fuerit? Vtrum ne & ipse secundum legem, pro toto ei legi fuerit obnoxius? Ambigi non potest. Certe de saluatore scriptura sic loquitur: Cum expleri essent dies purgationis eorum, secundum legem Moyse, duxerunt eum in Hierusalem, ut offerrent eum domino: sicut scriptum est in lege domini: Quia omne masculinū adaperiens uuluam, sanctum domino uocabitur: & ut darent hostias secundum quod dictum est in lege domini, par turturū, aut duos pullos columbarum. Si hæc lex tantum ad primogenitos pertinet, primogenitum autem sequentes faciunt, non debuit lege primogeniti teneri, qui de sequentibus ignorabat. Sed quia tenetur lege primogeniti, etiā ille quem fratres ceteri non sequuntur, colligitur eum primogenitum uocari, qui uuluam aperiat, & ante quem nullus sit, non eum quem frater post genitus subsequatur. Moyses scribit in Exodo: Factum est autem circa mediam noctem, & dominus percussit omne primogenitum in terra Aegypti, à primogenito Pharaonis, qui sedebat super thronum eius, usque ad primogenitum captiuæ, quæ est ad lacum, & omne primogenitum pecoris. Responde mihi: Qui tunc ab exterminatore fuerant interempti, primogeniti fuerunt, an & unigeniti? Si primogeniti tantum illi uocantur, qui fratres habent, ergo ab interemptione unigeniti liberati sunt. Si autem & unigeniti cæsi sunt, contra sententiā factum est, ut inter primogenitos & unigeniti morerentur. aut unigenitos liberabis à pœna, & ridiculus eris: aut si confiteberis interfectos, ingratis obtinebimus, & unigenitos primogenitos appellari. Extrema propositio fuit (licet id ipsum in primogenito uoluerit ostendere) fratres domini

mini